

GURUTZE SANTU LEZOKOAREN

BEDERATZIURRENEKO GOZOA.



Erromerian dator jendea
Lezoko Kristorengana,
Zeren munduak ondo dakien
Chit miragarria dana:
Dijoazenak ta datozenak
Lezon daukate meaztarra,
Biotz barrendik egiñarekin
Beren damuaz negarra.

Euskal-erriko guztiak, eta
Millaka erbestekoak,
Dira Lezoko Santo Kristoren
Egiazko debotoak:
Lasterka datoz ager egiten
Pekatu antziñakoak,
Damuarekin Gurutzeari
Galdezka barkazioak.

Mutuak, gorrak, ichu ta errenak
Lezoko eleiza onetan
Ikusi dira, ez bein bakarrik,
Baña bai asko alditan;
Itza egiten, ondo entzuten,
Argitzen, ibill lasterkan,
Fedearekin erreguturik
Santo Kristoren onetan.

Ez da eririk, ez da gañorik
Dolore ta samiñikan,
Lezoko Kristo miragarriak
Sendatuko ez duenikan;
Denborarekin batzuek, eta
Beste asko bertatikan,
Fedearekin biotz barrendik
Umill erreguturikan.

Ichasoetan erdi itoak
Egon diraden jendeak,
Salbatu ditu milla ta milla
Gurutze Santu gureak:
Promesa egin ta ekarri ditu
Esker on eta fedeak,
Negar malkoa dariotela
Ala zar nola gazteak.

Katibuturik egon diranak
Kate burnizkoz lotuak,
Legen zauriaz denbora luzez
Urrikari bizituak:
Lezon arkitu izan dituzte
Erremedio zerukoak;
Au ta geiago egiten daki
Gurutz Santu bertakoak.

Kristaurikan dan gaiztoenak,
 Biotzik dan gogorrenak,
 Zeruko bide berdiñ ederra
 Lezon daukate dianak:
 Beterik amar mandamentuak
 Kristori dagozkionak,
 Bere grazia Santua laster
 Betiko dauka gizonak.

Gurutze Santu miragarriak
 Mundu guztian du fama,
 Zeren beraren amorioak
 Gordetzen duen anima:
 Bitartekotzat ipiñirikan
 Maria Birjiña Ama,
 Urrikiaren galdezka gaude
 Gure jabe eta Jauna.

KOROA.

Lezora guazen fedearekin,
 An dago Zeruko Jauna,
 Gurutze baten iltzez josia,
 Besoak zabal gugana.

JOSÉ VICENTE DE ECHEGARAY.

